

Capsula convexa, externe pilis copiosis subulatis hispida, Color floris herbaceus.

Habitat juxta CUMANA ad viam versus Ipune.

2. **AYENIA** ^{profida} foliis ovatis acutis ferratis, germine pedicellato, nectario plano stellato.

Radix fibrosa, annua vel perennis.

Caulis ascendentes, spithamales - pedales, subsimplices.

Folia oblongo-ovata, acuta, ferrata, glabra; petiolo foliis paulo minore, incana, rubescentia. *Stipula* setaceæ, erectæ.

Flores 3 - 6, axillares, pedunculis capillaribus unius vel dua linear. longitudine, horizontalibus.

Calyx pentaphyllus, patentissimus, plano-reflexus: foliolis planiusculis, intus albis coloratis.

Nectarium Germen pedunculatum cingens, quinquangulare, subplanum.

Filamenta quinque, capillaria, calyce triplo longiora, erecta, modice arcuata, apice inflexa, conniventia, amicta Membrana plana, rhomboidali, ovata, marginibus latentibus anterioribus & apice inferiore cum Nectarii angulis connatis. *Antheræ* parvæ, connatæ unam mentiuntur, membranulæ versus apicem aduatæ, sessiles.

Germen pedicello (columella filiformi, erecta, staminum altitudine) elevatum. *Stylus* brevissimus.

Fructum non vidi.

Color calycis interni & filamentorum albus, centro Nectarii lutescens.

Adeoque in partibus haud paucis a superiore differt.

Habitat in depressis silvis juxta paludem, citra Fluvium UNARE.

3. **AYENIA** ^{tomentosa} foliis ovato-subrotundis tomentosis, germine pedicellato, nectario plano.

CAL. *Perianthium* quinquepartitum: *foliis* lanceolatis, acutis, persistentibus.

COR. *Petala* nulla.

Nectarium monophyllum, margine quinquefido, campanulatum.